



• केशरमान ताम्राकार

नाति दाइया सफूधुकू च्वसू धुकू नं खः

असं त्वाः व भोताहिनि त्वाःया दथुइ छगू फलचा दु । थ्व फल्चा दगुबहाःया लुखा धाःसां मपाः । थ्व हे फल्चाय् नातिबज्र अर्थात् नातिदाइया सफू पसः व नं मुक्कं नेपालभाषाया सफू जक तथा चायेका तःगु नेपालभाषाया सफू पसः - सफू धुकू । नेपालभाषा ख्यःया छगूयां छगू जक सफू पसः खः उगु इलय् जिं स्यूकथं । छगूकथं नेपालभाषा ख्यःया लागि सफू धुकू ऐतिहासिक सफूया धुकू खः । नातिदाइया बनेज्या खःसां थ्व छगू लय्ताः च्यः धाःसां पाइमखु । सुथनिसें बहनी ८/९ बजे तक अन जिं खनी ताथ्य कि नाति दइ कि वय्कःया तिरि मय्जु, गवलें गवलें बःचा बःचा धिक्कापिं मस्त ।

उगु ई जि क्याम्पस ब्वनाच्चनागु ई । त्रिचन्द्र क्याम्पसनिसें किर्तीपूर क्याम्पस, किपू तकया ब्वनामि । अथे धयागु विक्रम संवत् २०३२ निसें २०३९ तककया खँ खः । क्याम्पस चालीबलय् न्हिया न्हिथं धयाथें क्याम्पस लिहाँ वयेबलय् व हे सफू धुकुती च्वनाः गफ मुइकेगु नाति दाइलिसे । अप्वः धयाथें खँल्हाबल्हा वय्कःलिसे साहित्यिक जुइ । च्वसूया जुइ । सफूया जुइ । नेपालभाषा सफूया जुइ । जिगु स्खंगू सफू 'मिफुति', 'लागाय् जि' व 'जि विश्वास म्वाये' सफू धुकुतिइ मिइत ब्वयातःगु खनी । जिगु सफू मिया वय्कलं जितः गुण याःगु दु । सफू जक मखु जिगु सम्पादनय् पिदंगु 'जः' ल्याः १० व 'गं' ल्याः २ नं थःगु पसलय् तथाः न्हूगु 'जः', न्हूगु 'गं' पिदंगु दु धकाः विज्ञापन नं याना दी ।

सफू धुकुती सफू दइगु धयागु खँ हे जुल । जिं सफू धुकूयात मेगु छगू नं संज्ञा बी मास्तिवल - व खः च्वसू धुकू ।

सफू धुकूया निसें पुरककथं च्वसू धुकू नं धायेछिं । जिं

सफू धुकूयात च्वसू धुकू याना बिया नेपाल संवत् १०९५ स तिमिला खलः ल्हुतिया न्हापांगु नेपालभाषा साहित्य सम्मेलनया लागि च्वसू मुनेगु थाय् । जिं जक मखु उगु इलय् व स्वयां न्ह्यः नं लय् लय् पतिकं जूगु नेपालभाषा साहित्य सम्मेलनया लागि च्वसू बीगु थाय् वा च्वसू मुनेगु थाय् यँया लागि सफूधुकू खः - च्वसू धुकू ।

'जः' व 'गं' दँपैया सम्पादक जुइगु ह्वःताः जितः निक्कः

वल, जिगु विद्यार्थी इलय् । त्रिचन्द्र क्याम्पसं दँय्दसं पिदनीगु दँ पौ 'जः'या ल्याः १० व जि त्रिबिबि किर्तीपूर क्याम्पसं पिदनीगु दँपौ 'गं'या ल्या २ या लागि नं च्वसू मुनेगु च्वसू धुकूया ज्या सफू धुकुती हे जुल । नां जागु निगू क्याम्पसं पिदनीगु दँपौ जक मखु, त्रिबिबि किर्तीपूर क्याम्पस, नेपालभाषा खलःपाखें वि.सं २०३८ स ग्वसाः ग्वःगु अन्तर क्याम्पस नेपालभाषा साहित्य सम्मेलन (ग्वःक्वःगु लोमन) लागी च्वसू मुनेगु थाय् अर्थात् च्वसू धुकू सफू धुकुतिइ हे

जुल । थुगुकथं नातिदाइ सफू धुकूया थुवा जक मखु, प्रत्येक नेपालभाषा साहित्य सम्मेलन व क्याम्पस क्याम्पसं पिदनीगु दँपैया थुवा नं जुया दीगु दु ।

नेपालभाषा साहित्य थपू व प्रचार यायेया लागि वय्कःया योगदानया खँ ल्हाना मब्बाः । वय्कः ज्वः मडुम्ह भाषा थुवाः खः, भाषा जवाः खः । वय्कलं अनवरतरूपं थःत नेपालभाषाय् पाना बिज्यात । चिकुंला चिकु मधाः, वर्षा तांनवः मधाः । चिकिचा कूगु फल्चाय् च्वनाः नेपालभाषा साहित्यकारपिं लिसे उलि हे मिजास, नम्र व्यवहार यानाः च्वसु च्वकेगुया लागि अग्रह याना बिज्याइ । का थ्व पत्रिकायात च्वसू माल धकाः न्वाइ । सम्पादकपित्त उत्साह बीकथं च्वसूया लागि



धन्दा कायेम्वाः, जि कुतः याना बी धकाः थःगु सफू धुकुतिइ पला तःपिं साहित्यकारपिन्त घ्वातुध्वाना बिज्याइ, च्वसूया लागि। वय्कःया नुगल्य् सफू धुकू जक मखु, च्वसू धुकू नं जायाच्चंगु दु।

उकुन्हु तिनिया खँ। नातिदाइया चिकिचा हाकःगु खँल्हाबल्हा यूट्यूबय् स्वये धुनेवं भस्स लुमन। जिगु सम्पादनय् सिकागों पिदंगु 'सिकागो नेवाः'या ल्याः ७ वय्कःयात लःल्हायेत नेपालभाषाया न्हापांम्ह मिसा उपन्यासकार मय्जु शशिकला मानन्धरयात आग्रह याना। जिगु इनापयात वय्कलं सहर्ष स्वीकार याना दिल। छन्हु उगु पत्रिका ज्वनाः वय्कःया छँय् दगुबहालय् (जि वय्कःया छँ यक्वः वने लं) च्वनादीम्ह वय्कःयात लःल्हाना दिल। नेपाल संवत् १९९९स दकले न्हापां चित्तधर सिरपालं

हंकादीम्ह नातिबज्र बज्राचार्य सिकागो सिकागो नेवाःया द्यवः खनेवं वय्कःया ख्वाः तसकं चकन धकाः जितः शशिकालां कन अले धाल हँ - थ्व छगू तसकं बांलाःगु ज्या यात। चित्तधर 'हृदय' यात थथे पत्रिकाया द्यवल्य् मखनागु ताः दत हँ। चित्तधर 'हृदय'या देशं पिने प्रचार प्रसारया ह्वःता चूलागुलिं जिं थःत नं अहोभाग्य तायेका। अले नातिदाइ नं सिकागो नेवाःया आःतक्क पिदंगु पुलांगु ल्याः दुसा ब्वने मं दु धकाः शशिकलायात इनाप नं याःगु जुयाच्चन। अले शशिकलां दुसा वय्कःयात हया बीगु बचं नं बिउगु खनी। नातिदाइ गथे चित्तधरया किपा द्यवल्य् खना लय्तया दिल, अथे हे वय्कःया न्हूगु चिनाखँ वा च्वसू शिकागो नेवाःया वइगु ल्याखय् पिथने दत धाःसा वय्कः स्वया जि अप्वः लय्ताये दइ।



निबन्ना

नेपालभासा रय्यलय् जिवंकाछि
अनवरत सेवा याना च्वनादिइम्ह
छिस्कर नातिबज्र बज्राचार्यया
हरेक पलाः सुथां लानाच्चवनेमा।



पन्नरत्न तुलाधर
नायो

च्वसापासा
कुलांभुलुं, त्यंगः, यँ।